

22/10/1998

Kerajaan BN mirip Piagam Madinah

Amir Hamzah Nordin

JERANTUT, Rabu - Kerajaan Barisan Nasional (BN) yang memerintah negara ini mirip kepada kerajaan di bawah pentadbiran Nabi Muhammad SAW di Madinah yang berkongsi kuasa dengan kaum lain.

Menteri di Jabatan Perdana Menteri, Datuk Dr Abdul Hamid Othman, berkata Rasulullah mengamalkan dasar yang dinamakan Piagam Madinah iaitu umat Islam mentadbir dan berkongsi kuasa dengan kaum Yahudi, pelbagai puak serta golongan pedagang.

"Mereka membangunkan kerajaan dengan keadaan aman damai di bawah pemerintahan Rasulullah.

"Piagam itu juga jelas menunjukkan umat Islam boleh menerima kaum lain dan mentadbir bersama jika kaum berkenaan bersedia berbaik dengan umat Islam," katanya.

Beliau berkata demikian pada majlis ceramah isu semasa di Sekolah Agama Tengku Hajah Ampuan Afzan, dekat sini, hari ini.

Menurutnya, kerajaan BN membabitkan Umno, MCA, MIC dan beberapa parti lain berjaya menjadikan senario politik negara ini dalam keadaan yang baik sekali.

Katanya, kerajaan asing iri hati dengan kejayaan dicapai kerajaan kerana berjaya mentadbir negara dengan berkesan, menjamin kestabilan politik dan meletakkan ekonomi yang boleh menggugat kuasa ekonomi besar.

"Tekanan ekonomi yang dilakukan golongan tertentu untuk melemahkan kerajaan jelas sekali gagal kerana pentadbiran Datuk Seri Dr Mahathir Mohamad mempunyai cara tersendiri bagi menangani masalah itu.

"Contohnya, dasar sekatan terpilih yang mulai dilaksanakan bulan ini ternyata dapat mengukuhkan ekonomi secara berperingkat," katanya.

Mengenai pemecatan Datuk Seri Anwar Ibrahim, Abdul Hamid berkata, ia adalah perkara biasa dan pernah berlaku sebelum ini.

"Memang menjadi dasar parti untuk memecat ahlinya yang melanggar disiplin," katanya.

(END)